

胡文忠公遺集

胡文忠公遺集卷三十五

長沙鄭敦謹

湘鄉曾國荃

編輯

陳報官軍勦退太湖援賊片

九年十一月十六

再楚軍進勦皖逆前於攻克石碑巨鎮後卽設計進
攻太湖縣城乃該逆恃其城堅糧足死守待援臣官
文先經咨飭各軍首以絕賊援應爲勝算臣胡林翼
以相距太湖數十里之天堂地方形勢險要調派統
領昌字營副將銜儘先參將余際昌駐軍天堂以扼
其衝十一月初三日夜探報潛山舒城大股逆眾由

主簿園等處圖撲昌營賊眾不下萬餘余際昌派前
營游擊楊飛熊後營守備浦本祥各率步兵會司前
右中三營馬隊馳往迎擊又派中左等營分抄賊後
余際昌自率親兵接應布置甫定時已天明賊眾漫
山遍野而至我軍乘其喘息未定列隊奮擊鏖戰二
時之久悍逆抵死抗拒中營親兵外委金宜貴等首
陷賊陣殪其騎馬悍賊五人賊眾披靡潰逃我軍奮
力追殺後路兵勇同時夾擊斃賊一千數百墜巖落
澗死者不計其數馬步各軍追殺至雞冠嶺而還生
擒二十二名奪獲騾馬十七匹偽印五顆旗械千餘

鎗礮七十餘件據生擒賊供此股逆首僞鎮天侯劉
逆由舒桐潛山糾黨二萬餘人援應太湖被我軍擊
斃之騎馬賊卽有僞將軍郭逆在內等語由余際昌
馳報前來臣等查楚軍圍攻太湖爲該逆所必救本
在意中此次官軍以少擊眾大獲勝仗洵足以寒逆
膽而壯軍威現在馬步各軍近逼太城浚濠築壘絕
其外援之路則城賊無由逞志計旦可期得手除仍
飛飭該將士慎密勦辦迅克堅城另行馳奏外謹
將官軍勦退太湖援賊大獲勝仗情形合詞附陳
奉

旨知道了欽此

勘明各州縣已未成災請分別蠲緩疏

十二月

十四日督發

竊照湖北錢漕經

臣

等特定章程遇有災傷責成該

管道府親勘稟報不準稍有捏飾惟濱江各屬咸豐

九年夏秋水漲田地多被漫淹並有受旱之處據該

州縣先後稟報均飭道府履勘加結詳辦又沔陽州

楊三等一百四十一垓自鍾隄修復水道南行秋間

被淹補種後衝刷隄塍成災業經

臣

等奏明勘辦

各在案茲據該管道府稟報實勘得沔陽州楊三等

一百四十一垧居通城湖腹內秋閒江水漫淹涸復
補種十月閒江水復又驟漲由通城湖隄外橫衝而
入將登場之禾稼連房一併漂沒情形極重成災六
分麻思等九十五垧均被漫淹積水未消情形較重
金馬等一百六十五垧入秋以來陰雨過多收成歉
薄情形較輕嘉魚縣廣賢等八里及九洲九屯內低
窪地畝秋閒雨水連縣禾稼多被浸損情形較輕漢
陽縣菱角湖等十三區外江水漲不能疏消種植情
形較重孝感縣尚義等二百二社夏秋缺雨高阜處
灌救爲難情形較輕漢川縣喝城等二十五垧畝因

上游河水迭次漲發禾稼無收情形較重蓼湖等九
垸畝被淹後涸復補種情形較輕黃陂縣斗柞坂等
十社秋閒襄水漲發無從宣洩秋收失望情形較重
黃梅縣潘興口三處本係水衝沙壓之區本年淹漫
無收情形較重金林等三十五鎮亦被帶淹情形較
輕廣濟縣泰東等三鄉積年衝壓仍未翻挑情形較
重鍾祥縣河鄉楊林等十五村莊湖鄉鐵牛垸等二
十九村莊頻年被淹本年復被淹沒情形次重京山
縣高集等二十七團鍾隄甫經築成閒有涸出尙多
沙壓秋收歉薄情形次重天門縣田灣等五十三垸

並多多等三畝坑內最低之七十六甲濱臨襄河漫淹無收情形較重江陵縣止西旺等三十一畝水田羅家剝潰口灌入致被漫淹老長等二十八畝江支等隄節次潰口水衝沙壓均不能翻種情形較重南湖中洲等七十二畝地勢本低本年襄水復漲積潦難消情形次重公安縣毛三毛四兩里及刀一等十五里內五十八甲地勢低窪馬林工潰口未修被淹無收情形較重刀一等八里內之十甲同白一等十五里補種歉收情形較輕石首縣民旺等十六畝並一都等十三坊坑內二十五甲逼近馬林工潰口田

地被淹情形較重柳子等十四坊垸內二十七甲並
張惠等九坊垸內二十甲九嶺等三十一坊垸補種
歉收情形較輕監利縣崇林等一百一十七垸係頻
年積淹本年隄潰全未種植情形較重萬家等二百
六十二垸補種歉收情形較輕松滋縣下五等九都
內壩莊等四十八處並一所等八所隄潰後水道壅
塞秋閒江河泛漲積淹無收情形較重枝江縣靑夾
等二十五洲垸被淹補種收成甚薄情形較輕荊門
州馬上三等九圖內萬家嶺等二十九區襄水迭漲
衝開民隄開口淹沒無收情形較重馬上三等六圖

內李家廟等十區稍有補種情形次重又江夏縣城內之崇通等屯城廂內外並漢陽縣居仁由義崇信三坊房屋被賊燬盡後居民多未復業又羅田縣迭遭賊擾民力未紓以上沔陽嘉魚漢陽孝感漢川黃陂黃梅廣濟鍾祥京山天門江陵公安石首監利松滋枝江荊門等州縣除沔陽州楊三等一百四十一垧被淹成災外餘俱勘不成災係屬被淹受旱積淹歉收並屯坐各衛軍田輕重情形相同暨江夏漢陽二縣房屋多未復業羅田縣賊擾民力未紓緣由委無捏飾情弊由藩司莊受祺署糧道張曜孫酌擬分

別蠲緩展緩新舊錢糧南米會詳請 奏前來 臣等

伏查州縣遇有水旱災傷例應勘明分數分別撫賑
蠲緩如不成災亦請緩徵遞展本年湖北各州縣祇
有沔陽州被淹成災六分例應撫賑惟現值庫藏支
絀軍餉不繼實難籌辦已飭諄勸紳富就地賑濟好
爲安撫俾免失所其應徵錢糧等項同勘不成災各
屬應徵各款若責令照常完納民力實有未逮除請
緩漕糧另摺請 旨外合無仰懇 天恩俯準
將成災六分之沔陽州陽三等一百四十一垧應徵
九年錢糧南米照例蠲免一分蠲贖銀米一併緩至

十年秋後分限兩年帶徵勘不成災被淹較重之泗陽州麻思等九十五垵漢陽縣菱角湖等十三區漢川縣喝城等二十五垵販黃陂縣斗柞坂等十社黃梅縣潘興口等三處廣濟縣泰東等三鄉天門縣田灣等五十三垵多多等三十垵內最低之七十六甲江陵縣上西旺等三十一垵老長等一十八垵公安縣毛三毛四兩里及刀一等十五里內五十八甲石首縣民旺等十六垵並一都等十三坊垵內二十五甲監利縣崇林等一百一十七垵松滋縣下五等九都內塌莊等四十八處並一所等八所荊門州馬上

三等九圖內萬家嶺等二十九區各應徵九年新賦
錢糧南米蘆課隄閘河費閒丁租餉等項一併緩至
十年秋後限一年帶徵其各屬原緩六七八等年銀
米分別遞展一年帶徵又沔陽漢川漢陽黃陂天門
五州縣最重垸內均尙有應徵七年 奏銷民欠未
完銀米一併展至十年秋後再行催徵又次重之鍾
祥縣河鄉楊林等十五村莊湖鄉鐵牛埂等二十九
村莊京山縣高集等二十七團江陵縣南湖中洲等
七十三垸荊門州馬上三等六圖內李家廟等十區
除九年南米照常徵收外請將應徵九年新賦錢糧

蘆課隄閘河費閘丁租餉等項一併緩至十年秋後
限一年帶徵其應帶徵八年緩徵銀米隄費等項展
至十一年秋後限一年帶徵原緩六七等年銀米蘆
課隄費等項請俟八年緩徵銀米徵齊後再按最先
年分遞年帶徵較輕之沔陽州金馬等一百六十五
垸嘉魚縣廣賢等八里及九洲九屯漢川縣蓼湖等
九垸畝受旱之孝感縣尙義等二百二社黃梅縣金
林等三十五鎮公安縣刀一等八里內之十甲同白
一等十五里石首縣柳子等十四坊垸內二十七甲
並張惠等九坊垸內二十甲九嶺等三十一坊垸監

利縣萬家等二百六十二垧枝江縣青夾等二十五
洲垧各應徵九年新賦錢糧南米等項照常徵收請
將六年起應行帶徵銀米分別遞展一年帶徵沔陽
州漢川縣較輕垧區內有七年 奏銷民欠銀米亦
展至十年秋後再行催徵各屬五年以前有無遞緩
帶徵之項應照 奏案俟清查完竣另行查辦至武
昌等衛軍田應徵應緩銀兩均照屯坐各州縣一律
辦理又江夏縣崇通稍水等屯漢陽縣居仁由義崇
信各坊應徵九年楚課門攤地課銀兩亦請展至十
年秋後帶徵八年所緩銀兩並請遞展一年羅田縣

六年應行帶徵錢糧漕南二米亦請緩至十年秋後
再起帶徵之限以廣

皇仁而紓民力除成災處

飭取頃畝冊結另行

題送外所有勘明沔陽州被

淹成災分數暨嘉魚等州縣被淹受旱勘不成災輕
重情形分別蠲緩新舊銀米緣由理合恭摺由驛具
奏伏乞

皇上聖鑒訓示再

臣等與司道恐情

形不確駁查至再至三並臣胡林翼因援賊大股西
犯道員李續宜尙未赶到已馳往皖邊就近策應是
以奏報稍遲合併陳明謹奏

勘明各州縣被淹田地請緩徵漕糧疏 十二月

十四日督發

竊查前準部咨嗣後蠲緩漕糧於地丁摺外另行具摺候

旨遵辦等因湖北省濱江各屬咸豐九年夏秋被淹受旱暨水衝沙壓之區現經臣等將錢糧南米等項勘明已未成災輕重情形另摺

奏請分

別蠲緩展緩外惟沔陽漢陽黃陂黃梅廣濟天門江陵公安石首監利松滋等州縣尙有應徵漕糧力難輸納據藩司莊受祺署糧道張曜孫轉據該管道府結報會詳請緩前來臣等覆加查覈無異合無仰懇天恩俯準將成災六分之沔陽州陽三等一百

四十一垸應徵九年漕糧緩至十年秋後分限兩年帶徵勘不成災被淹較重之沔陽州麻思等九十二垸漢陽縣菱角湖等十三區黃陂縣斗柞坂等十社黃梅縣潘興口等三處廣濟縣泰東等三鄉天門縣田灣等五十三垸多多等三十垸內最低之七十六甲江陵縣上西旺等三十一垸老長等一十八垸公安縣毛三毛四兩里及刀一等十五里內五十八甲石首縣民旺等十六垸並一都等十三坊垸內二十五甲監利縣崇林等一百一十七垸松滋縣下五等九都內塌莊等四十八處並一所等八所各應徵九

年漕糧緩至十年秋後限一年帶徵其各屬原緩六
七八等年漕米均分別遞展一年帶徵以廣 皇
仁而紓民力理合恭摺具 奏

楚師迎剿槎水畝援賊大勝疏

十二月十四日

竊楚軍入院圍攻太湖前已將擊退天堂王婆坳等
處援賊情形馳奏在案茲月餘以來太湖城賊死守
如故而桐潛賊眾屢欲伺我軍之隙圖奪天堂營壘
蓋天堂爲潛太之要衝故該處所必爭也十一月十
九日探報距天堂電營七十餘里之槎水畝地方桐
潛大股逆黨二萬餘人陸續麤至將襲我天堂之後

爲太湖之援經統帶昌字全軍副將銜儘先參將余
際昌總管禮桂三營訓導丁華先商同潛山縣葉兆
蘭以本地練勇分伏雞子河黃龍口鐵鎖嶺老鴉嶺
等處以扼問道賊蹤而以官軍之昌字前後二營左
右中副四營派六成隊又派禮桂三營各七成隊余
際昌丁華先皆親督接應各帶乾糧於二十日黎明
從山徑暗度二十一日辰刻齊抵蠶牛嶺山麓而嶺
頭守卡之賊卽遁我軍越嶺行數里至槎水畝賊分
三股排列隊伍旂幟如林余際昌等以兵行遠至傳
令暫息且示弱以誘之而密分兩軍繞出賊後逾時

首尾夾擊賊遂大潰各隊弁勇或毀其柵壘或搜殺
館賊乘勝追斬直抵龍井關收隊而還計先後斃賊
一千四五百名生擒正法一百五十七名並據賊供
賊目僞漢天侯拱天豫二名同時擊斃奪獲僞印九
顆大銅礮二位騾馬三十二匹擡槍烏槍旂幟五百
餘件刀矛不計其數此二十一日擊退槎水畝大股
援賊之實在情形也據余際昌等馳稟前來臣等查
楚師力攻太湖援賊詭計百出此次我軍以少擊眾
大挫兇鋒傳聞逆首陳玉成糾集十餘萬之眾欲上
犯楚境抄襲太湖我軍後路以解太城之圍雖賊情

虛實未能預料而戒備宜嚴臣胡林翼已於各要路分兵堵禦靜以待動逸以待勞仍當嚴飭各軍慎密勦辦迅克堅城以慰宸廑謹將楚軍勦辦援賊大獲勝仗並分兵堵禦情形會同繕摺具奏

再曾國藩於八年九月前赴閩浙辦理軍務經臣等奏奉諭旨湖北省按月解協餉二萬兩並加撥銀一萬兩截至本年十月二十四日止先後撥解協餉並加撥銀共四十八萬兩均經奏報在案嗣因曾國藩督師皖省秦晉蜀三省解餉未到軍食不支又由楚北自十月二十四日起至十二月二十四日

止計兩箇月於原撥餉銀三萬兩外加撥月餉三萬兩共解過庫平銀十二萬兩均經督飭湖北糧臺竭力籌措在司庫地丁款內如數勻撥先後委通判長坦千總孫長鐸解赴黃州巴河行營交收以資接濟惟楚軍分道東征兵增餉絀如明春秦晉等省協餉仍復愆期必至楚省獨力難支關係非輕相應仰懇

聖恩飭下陝西山西四川督撫

臣

恪遵疊次

諭旨將應撥協餉設法籌措按月如期解交楚省轉解會國藩大營以免停軍待餉而利遄征再江西已全省肅清其錢漕額數倍於楚省並求

飭下

江西撫臣於協濟會國藩月餉三萬兩外每月再增撥銀三萬兩又浙省錢糧徵數亦鉅可否由浙江撫臣按月酌籌接濟該兩省相距會國藩大營較近於軍食更有裨益祇候訓示施行爲籌策東征軍需緊要起見謹附片具陳

硃批戶部查議速奏欽此

陳報移營日期疏 十二月二十日

竊惟楚軍征皖侍郎臣會國藩駐紮宿松多隆阿鮑超唐訓方蔣凝學馬步四軍圍守太湖將軍都興阿因病暫回荊州本任道員李續宜因母病假歸未至

探聞逆首糾合粵匪捻匪大股上犯臣於十月二十
八日自黃州移營至蘄州陳德園距太湖百里籌商
太湖各路軍情布置稍定十二月初六日移營英山
縣城南距黃州約二百餘里距羅田蘄水約各數十
里控引潛霍規畫六舒亦尙可捍蔽楚疆兼顧豫境
臣查安徽潛山縣屬之天堂雄據山中實爲舒桐英
霍之總要守此不失可扼賊吭臣先於九月密飭參
將余際昌等奪此天險以九營駐其中力戰疊勝業
經會奏在案惟孤軍深入皖境二百餘里處賊所必
爭之地更當審察機宜隨時策應刻下援賊大股西

犯籌兵迎勦戰勝軍情應隨時咨會督臣官文驛報外謹將臣移營英山日期由驛恭摺馳奏

奏陳逆首投誠獻城旋爲賊黨襲踞先後勦撫辦理情形疏 十二月二十日督發

竊臣官文等前接楊載福來函池州賊目僞王國宗韋志俊自廣西被洪秀全誘從屢被欺凌父母兄弟盡遭殺戮近又與盤踞建德逆首楊宣清仇隙立意投誠於九月二十五六等日三次遣人至楊載福水營具呈獻城歸順繳僞印僞照各數百件情願收取蕪湖太平關建德等處立功贖罪各等因其著名逆

首久踞池州所部不下數萬強悍衆多雖云自拔來歸究難深信是以未敢遽行具奏姑許以我軍礮船協助責其成功後始爲奏懇天恩免其治罪

一面飛行布政使銜廣東惠潮嘉道彭玉麟親督副將黃翼升等率內江各營駐黃石磯十月初四日派總兵李成謀副將李朝斌參將劉正隆各率戰船千總李楚材領步兵二百均赴池州會同攻守初七日韋志俊遂派部下頭目古隆賢賴文鴻劉官方黃文金等率隊往襲蕪湖韋志俊在府城分派防堵建德石埭等處之賊一面曉諭城內軍民概行薙髮歡聲

雷動詎料古賴等逆中道變生十月初九日糾眾反
戈回撲府城經韋志俊李楚材率隊迎擊劉正隆卽
帶舳舻駛入城西湖內連開排礮斃賊甚多賊始退
去適督帶江南艇船總兵李德麟亦至會同防剿十
二十三兩日賊眾復至均經官兵擊退賊卽於城外
西北紮營十三夜五鼓賊負長梯驟撲城下李楚材
卽出截殺韋志俊領數十人縋城接戰奮力衝突水
師施放排礮賊勢少卻李德麟李成謀等曾派韋志
俊李楚材帶隊緊防陸路李德麟李朝斌緊守城北
李成謀等帶礮船繞湖而入十四日黎明古賴劉黃

等賊率大股趨北門外欲撲官營李德麟李朝斌開礮迎擊李楚材韋志俊同時出戰殺入垓心李楚材身受四傷負傷力戰賊勢披靡四潰韋志俊李楚材乘勝追殺二十餘里奪獲旂械鎗礮甚多生擒正法百餘名其奔近西門大路之賊經李成謀等礮船轟斃無數此次痛剿之後古賴劉黃等賊遁歸青陽銅陵等處勢極窮蹙池郡正可大定臣等正在籌議安插降眾之法一面會商具奏接準軍機大臣字寄咸豐九年十一月十四日奉 上諭前據和春奏池州逆首韋志俊投誠歸順獻出城池志堪嘉尙惟

所部人數眾多一切安插事宜著官文等妥籌迅速具奏欽此遵 旨寄信前來臣等遵卽咨行安籌

宣示 聖主寬大之恩該降眾同聲感泣惟先接探報古賴等逆密約僞國宗楊輔清糾集徽甯悍賊二萬餘人復攻池州韋志俊部下除來歸後裁汰老弱遣散外尙有萬餘人芻茭不給城內人心惶惑彭玉麟因親率三營赴池傳齊韋志俊等剴切開諭妥爲布置十一月十五日賊眾大至經彭玉麟督率水師各營並韋志俊李楚材等極力擊退二十四日辰刻賊率大股竄至柳波磯地方李成謀等轟礮迎擊

斃賊甚多該逆退匿民房並潛伏山窩各帶簾牌洋鎗擡鎗誘敵我軍嚴陣以待未刻李楚材等帶隊衝動伏賊我軍水陸協攻賊始退去仍屯聚數里之外二十五六等日賊眾麇至韋志俊率隊赴援該逆分爲二股一當旱隊一敵水師施放洋鎗子落如雨千總謝如友力戰陣亡其時內港水涸礮船不便往來該逆紮營磯上遂隔水師於外逆渠楊輔清率賊眾環攻池城韋志俊李楚材與賊接戰數晝夜軍士勞苦已極該逆懸立重賞以購韋志俊李楚材二人三十日戌刻韋志俊正在城外打仗突有奸細潛開東

門賊眾一擁而進城內降眾巷戰死者以數千計池州府城遂於十一月三十日復陷於賊旋據韋志俊稟報衝出重圍收集潰卒暫駐泥灣地方聽候安插此韋志俊率眾投誠獻出城池因賊黨古賴等逆中途生變糾集徽甯大股襲陷池郡並官軍分別勦辦之實在情形也臣等查韋志俊悔罪來歸與數萬悍賊連日力戰屢獲勝仗斬馘不可勝計其歸順之心尙屬可信徒以部下叛去之古賴等逆糾集楊輔清大股與韋志俊懷恨最深必欲得而甘心遂至城池復爲襲踞楊載福現在札調韋志俊領眾前來張溪

鎮就近安撫臣官文臣胡林翼公同籌商韋志俊部下強壯者尙有數千此時以散其羽翼爲要著已由彭玉麟於香口及東流城外設局委員查明降眾怯弱者發給護票川費遣歸本籍其精壯者酌籌口糧分別調開協助水陸各軍使之立功自效庶操縱在我我不致復叛以杜後患一面責令韋志俊立功贖罪再行籲懇恩施外謹將池州逆首投誠獻城賊黨乘夜襲踞官軍先後勦撫辦理情形會同繕摺由驛五百里馳奏

硃批知道了降眾因城失戰死者著官文等查明酌量請

卹以示矜恤而離逆黨欽此

再前準安徽撫臣來咨皖北軍情危急借撥餉銀槍
桿等項業經臣等撥解奏報在案嗣準來咨以皖省
正當勦辦之際餉竭兵飢請再借撥銀一萬兩在於
陝西應協皖省月餉內劃撥叩還並請借撥葯鉛等
項臣等查鄂軍水陸會合東征軍火糧餉需用甚鉅
近復撥濟會國藩軍餉實屬掣肘萬分而皖省唇齒
相依自應不分畛域以全大局茲於萬難籌撥之中
行飭糧臺司道在於司庫待放兵餉內借撥銀一萬
兩給發來員解回交收旋據皖省委員劉立恭來楚

購辦籐牌惟查籐牌產於湖南廣東兩省楚北無從
購辦又在於司庫正項款內籌借銀一千兩作爲楚
省協餉交該委員祇領前赴湖南廣東一帶購辦以
上撥解皖省餉項請均由皖省另入報銷無庸籌還
楚省並酌撥火礮二千觔鉛丸擡鳥鎗子各二千觔
先後分別委員協同來弁解赴皖省軍營並飛咨翁
同書派員迎提以濟軍需除分別咨行外理合附片
奏聞

奏陳皖逆擒匪上犯楚軍分路剿辦獲勝情形

疏 十年正月十五日督發

竊楚軍圍攻太湖節次擊退賊援前已馳奏在案
嗣十二月二十一日探悉逆首陳玉成卽四眼狗糾
聚捻首龔瞎子等在潛山縣屬之地靈港東西兩岸
築壘二十餘座依山傍嶺賊營尤多意將分路上犯
以解太湖之圍福州副都統多隆阿察看地勢與總
兵鮑超商議分路進兵當派副都統銜協領喀爾庫
馬隊會同鮑超五營步隊由西路進剿又派副都統
銜協領西林布馬隊與精選左右飛虎中右及開化
五營步隊又派委營總金順巴彥杜楞各帶馬隊會
同候選道蔣凝學四營步勇由中路進剿多隆阿親

率弁勇三路策應二十二日辰刻各軍布置甫定賊眾漫山遍野層列密布多有悍捻施放背鎗慄悍異常直前迎拒多隆阿以東中兩路馬步各軍直趨地靈港而以西路一軍分繞賊壘之後腹背夾擊該逆悉眾抗拒多隆阿鮑超指揮兵勇奮力衝擊當將東岸賊壘十一座全數踏平斬殺悍賊無算通山嶺賊眾蜂擁而至西林布率隊直入賊中擒斬多名而賊圍愈眾鎗子如雨西林布連被數鎗登時陣亡維時西岸賊壘亦經喀爾庫率同馬步兵勇連踏數座斃賊甚夥逆眾往山潰逃喀爾庫匹馬當先率領各隊

且追且殺追過山峽喀爾庫被伏賊鎗礮擊中陣亡
馬步員弁兵勇傷亡者亦三百數十餘名時值天晚
當卽收隊計是日鏖戰五時之久斃賊不下六七千
名內斃黃衣逆首甚多生擒數十名等情馳報前來
臣等查此次陳玉成糾合龔捻等號稱十餘萬踞潛
援太悉眾上犯尤爲狡悍異常我軍以少克眾實由
將士齊心用命得以奮力擊退關係東征大局良非
淺鮮而皖地賊勢蔓延勦辦殊非易事現仍諳飭各
軍慎密戒備相機進取副都統銜墨爾根城鑲白旗
協領阿木爾罕巴圖魯西林布又副都統銜吉林滿

古三才集卷之三
州鑲白旂佐領儘先協領奇車格勒巴圖魯喀爾庫
均係轉戰數省身經數百仗所向有功此次力戰捐
軀深堪憫惜仰懇 天恩俯準 飭部照副都

統例從優議卹又陣亡儘先參將吳明亮請照參將
例從優議卹以慰忠魂其餘陣亡員弁兵勇容查明
另行造冊分別 奏咨籲懇 恩卹合併陳明謹
將皖逆糾合捻匪悉眾上犯楚軍分路剿辦大獲勝
仗情形會摺出驛五百里馳 奏

謹按疏內請卹各員於正月二十八日接奉

旨準

征皖各營於潛山太湖夾擊粵捻逆匪大勝疏

正月二十五日督發

查九年十一月探知逆首偽英王陳玉成以其悍眾
勾串捻逆龔瞎子張落刑等自江浦廬州定遠分道
上犯號稱十餘萬人臣等往返函商均以抽撥太湖
圍師迎擊援賊爲先著十二月十六日探稱賊分三
路並進遂移鮑超之霆營於潛山小池驛以當前敵
移蔣凝學湘軍駐龍家涼亭多隆阿自以其馬步各
軍駐新倉而援賊已漫山徧野循潛山城西太湖城
東傍山爲營均逼小池驛霆營一帶袤斜三十里作

壘百餘座十八日太湖城賊見我圍軍抽調前敵遂
突圍以接應援賊適蔣擬學湘軍尙畱四營未移遂
設伏於東門誘擊勝之賊仍入城臣曾國藩以太湖
兵單圍解大局可虞而迎擊援賊之師尤恐腹背受
敵十二月二十日抽派宿松十營六千人交總兵朱
品隆主事李榕馳赴太湖與唐訓方合軍駐於城之
西北南三面而圍師之力乃厚十二月二十一日小
池驛援賊以大股圍撲霆營日夜不息總兵鮑超獨
力禦之二十二日多隆阿鮑超蔣擬學各軍約分三
路迎擊踏平賊營十三座斃賊約六七千名官軍焚

賊壘而不忍延燒民房不知伏賊預藏村落之中我軍深入爲賊所包抄自己至西血戰縱橫再接再厲賊始敗退整隊回營而我軍馬步各營陣亡亦六七百餘員名昨已將獲勝情形馳奏并聲請將力戰陣亡之副都統銜協領西林布等仰懇 恩卹在

案嗣賊勢專趨於小池驛十二月二十四日至二十八九等日更番迭進圍逼寔營署寔左營事副將銜候補參將蘇文彪寔後營儘先參將段福尤當賊壘之衝賊匪日夜環攻士卒傷疲志氣彌厲以孤軍力抗十倍之賊自誓不退一步不棄一壘

臣會國藩加

撥護軍長勝平江等營三千人並順字營馬隊馳赴太湖而抽唐訓方一軍赴援小池驛臣等又飛調麻羅防兵之建威等營赴新倉飛調恆左恆右曾貞幹督前趙克彰督右朱希廣督左楊得武等營赴太湖又調管帶營兵阿達春督中李續燾等營臣曾國藩亦調喻吉三凌蔭庭各營赴潛山之羅溪河遏賊繞我軍之後多隆阿於十二月二十九日督隊爲霆營護運旋於三十日派精選前營副將銜儘先參將楊朝林駐霆左營之壘移霆左營於霆中營暫行養傷精選前營換入霆左營以遏賊壘之衝士卒續有傷

亡勇氣百倍正月初六日唐訓方移營於蔣凝學鮑超兩軍之中以資聯絡而通餉道多隆阿亦派精選右營儘先參將王可陞駐霆左之旁而令霆左仍駐原壘馬步各軍忿與賊戰精選右營之壘卽日而成訓營之壘未成而賊已進逼遂令我軍合紮新倉多隆阿於正月十二日復派精選中營精選前營移紮小池驛十三日派勝勇營駐小池驛之南臣曾國藩飭太湖各營抽調七營派總兵朱品隆馳赴新倉以資援勦兵力漸厚餉道可通刻期會勦當可破賊此太湖潛山山外各軍布置調度力戰兼旬之情形也

初賊之西犯也聲言北竄壽州六安其霍山等處士
民震恐臣等已派步兵五營馬隊四百人馳入霍山
樂兒嶺矣而大隊且持重不發俟賊情之畢露而後
起而乘之潛山之天堂鎮爲太潛英霍舒桐六縣之
關鍵萬山叢薄雄踞皖畧賊匪力爭此險我軍均已
擊退此固可用奇兵之要道也密飭候選知府金國
琛領撫湘十四營會同前駐天堂之九營開道疾趨
犂山而行積雪滿山堅冰在途士卒攀援險阻除夕
元旦行役不倦閱十日乃出潛山之高橫嶺仰天庵
從萬山深處俯視平原均在目中已可捐其背而扼

其吭遂密與多隆阿等訂內外夾攻之約正月初十日金國琛率各營駐仰天庵一帶居高臨下小池驛龍家涼亭諸軍亦在望中十一日寅刻天尙未明賊分四大股來撲或攀援而上或伏莽而進聲震山谷金國琛嚴飭各軍靜鎮以待其時大霧未收賊已潛至山腰已刻我軍驟起撲之或迎擊其首或橫截其腰或斜抄其尾賊大敗鎗斃殺斃墜崖落澗死者不計其數并擒斬僞職崇天富藍承宣一名獲其僞印僞照此卽昔年擾害楚疆專管蘄黃一路之賊目也午刻參將余際昌訓導丁華先率昌字禮字桂字九

營已在高橫嶺出隊擊賊金國琛因令各營併力夾
攻近營之賊壘賊館盡破之酉初收隊計斃賊三千
餘名奪獲賊械無算生擒四百餘名此則山內一軍
援剿大勝之情形也此次逆首陳玉成嘯聚廬州定
遠舒城桐城廬江三河浦口六合各路之賊陸續麕
至急援太湖亦實以梗阻楚軍仰賴 天威士卒
用命山外一軍已知山內之軍剿賊得手訂期夾攻
大破援賊現已諄飭各軍慎密戒備相機進取除將
傷亡員弁分別另單請卹外其力戰堅守之各營將
士或以孤壘力遏賊鋒或以血戰保全大局仰懇

皇上天恩準其擇尤彙案保奏以勵戎行謹將調集各軍併力夾擊大獲勝仗緣由台詞恭摺馳奏

陳報飛飭蕭軍取逕入川協勘片

正月二十五

再蕭啟江一軍昨準南撫

臣

駱秉章咨會以接到會

國藩函商皖逆大股上犯圍逼鮑超營壘危急之至

請暫飭蕭啟江全軍來鄂以爲後繼經駱秉章飭令

蕭啟江移緩就急改赴漢陽調遣聲明具

奏等因

咨會前來

臣

查會國藩因皖逆披猖兵力單薄請暫

調蕭啟江所部回援誠屬萬不得已之舉惟刻下正

值川省敘州匪徒滋事石逆又有窺黔竄蜀之心疊

奉 寄諭令蕭啟江一軍馳援川黔仰見 聖

慮周詳是蕭啟江一軍有萬難回鄂之勢適接下游
征皖各軍擊退大股援逆之報楚軍已可無慮並據
蕭啟江來稟所部行抵常德洞庭西湖地方臣已由
六百里飛飭蕭啟江全軍仍卽折回不必來鄂更慮
繞赴黔界道途遙遠轉落賊後因卽飛飭由常德取
道入江逕赴川省先協剿敘州土匪該省得此一軍
勁旅自易尅期撲滅卽石逆竄入黔省亦可出川迎
剿先掃清川蜀土匪以保完善之區兼顧邊防而固
西北大局頃接曾國藩咨函商議停調與臣意見相

同除一面飛咨川南各督撫臣及沿途地方文武遵照外謹將蕭啟江一軍不必繞路赴黔卽飭馳赴川省以速戎機緣由會同會國藩合詞附片具奏

恭謝

恩賞福字各物疏

正月二十八日

臣於咸豐九年十二月二十九日由驛齎奉

欽

賞福字一方藍辦大荷包一對小荷包二對銀錢二箇銀鏤四箇橋餅六觔百合粉十四觔南棗十四觔白蓮子十四觔杞果六觔挂麪四十把奶餅二十觔到臣行營臣謹卽恭設香案望闕叩頭祇領欽惟

皇上深仁普被同稱

萬壽之觥

文德

誕敷共進三多之祝時當元日

瑞靄景星

璇題仰

義畫之文

寶翰錫箕疇之慶煥章

身於組紱魚佩同榮資利用以泉流蚨飛足式重以
丹華紫實玉屑瓊英拜嘉寵於上方倍悚

惶於下惴

臣

惟有激勵將士宣布

恩威同澤同

袍足兵足食卽慶

禧延匝地銷吳皖之狂氛咸

欽福錫自

天頌

唐虞之

盛世所有

微

臣感激下忱理合敬謹繕摺叩謝

天恩伏乞

皇上聖鑒謹奏

胡文忠公遺集卷三十五終

胡文忠公遺集卷三十六

長沙鄭敦謹

湘鄉曾國荃

編輯

克復太湖縣城疏

十年二月初七日督發

查逆首僞英王陳玉成以其悍眾十數萬勾串各路
捻逆力援太湖所有臣等調集各軍於潛山太湖山
內山外預籌夾擊兼厚圍師及山外前敵力戰兼旬
山內於正月十一日援剿大勝各情形均經縷陳馳
奏正月十二日以後各軍遂訂期夾擊并密紂小
池驛三次排鎗爲號山內諸軍亦三次應之而皆爲

風雨所止賊亦乘陰霧四塞潛移其壘於羅山衝白沙畈一帶冀與太湖城賊勾通分股繞犯牽綴我軍我軍因卽雨雪之中得從容會商分撥各路以大圍包裹援賊復以伏兵橫截城賊正月二十五日多隆阿率所部馬隊并精選開化飛虎勝勇親兵建威督前督右等營各步隊鮑超率霆字五營唐訓方率訓字七營蔣凝學率湘軍八營朱品隆率湘軍七營均黎明會齊移營逼賊賊之黃蓋紅旗彌山漫谷蟻聚蜂屯馬賊馳驟尤爲兇悍多隆阿令其步隊誘之賊果分股來撲我軍驟起回擊蔣凝學橫截之唐訓方

尾抄之朱品隆扼之於右鮑超遏之於前多隆阿自率馬步衝堅陷陣從中路殺入賊遂大敗殺賊三千餘名陣斬黃衣馬賊及長髮老賊甚多奪獲騾馬百餘匹旂幟器械無算生擒百餘名趙克彰等并擒獲僞庶天侯麥烏富僞軍帥旅帥巡查汪遂林陳得勝曹正太等二十七人戍刻收隊是夜多隆阿等籌分東西中三路乘勝急攻之策二十六日黎明出隊東路爲小池驛鮑超以五營及趙克彰朱希廣二營出其左唐訓方七營出其右而以吉林二起黑龍江二起馬隊繞外以截竄賊西路爲羅山衝朱品隆七營

由衝西進蔣凝學八營由衝口進而以吉林六起黑龍江九起馬隊繞外以截城賊中路則多隆阿之精選四營飛虎左營開化勝勇建威及親兵等營進攻而以吉林八起黑龍江八起馬隊由後策應多隆阿審察地勢自東堰口而西周圍袤廣二十餘里賊館賊壘密如蜂房逆首陳玉成踞羅山衝內悍賊馬賊萃此尤多正列隊進攻開山賊一齊擁出層列如雲壓軍而陣勢甚兇猛我軍踴躍直前逼攻衝外之壘賊鎗礮齊施子落如雨我軍無一退卻山賊愈集愈多多隆阿因思山賊不破則壘賊難平遂督中路西

路併力攻山奮呼直上蔣凝學連破衝口賊卡攻入
山內朱品隆越山而進兩軍層層上多隆阿馬步
由賊壘鎗礮之中衝突而前前者傷亡後者繼進山
賊抵敵不住紛紛敗竄衝外衝內兩面奮擊轟斃殺
斃屍盈澗谷東路小池驛之賊分作四路抗拒約數
萬人而田壠中大股尤多鮑超親督霆左鄭陽和蘇
文彪霆右余大勝易昌煥霆前黃慶霆後段福霆中
陳由立宋國永劉車龍等由東路左面衝擊田壠之
賊朱希廣趙克彰繼之唐訓方在東路之右見左面
賊眾且悍而霆營獨當其衝又由右面撥四營助之

鏖戰二三十合勇氣益奮聲震山谷賊遂回奔唐訓方亦親督各營由右面斜刺而來我軍左衝右突賊益狂竄我軍遂合東西中三路一齊追殺乘勝合攻賊壘時值東南風緊火箭火蛋觸處卽然頃刻賊棚賊館延燒七八里風利火急燎及山腰煙燄蔽天樹焦山赤大小賊壘一百數十座頃刻胥平棚館數百亦無一存者斃賊約七八千名生擒三百餘名奪獲鎗礮軍械無數鮑超營中又獨獲大礮二十四尊二千五百觔夷礮一尊擡鎗小鎗千餘桿此太湖潛山山外各軍二十五二十六等日大破援賊之情形也

山內之軍知府金國琛參將余際昌訓導丁華先等
自正月十一日仰天庵戰勝後偵知銀硃塔一帶之
賊盡移白沙畷小池驛等處我軍因於十八日移進
紅長山觀音巖一帶以逼賊壘十九日聞山外號礮
之約卽由廣福寨分路出隊旋遇雨雪多隆阿由山
外飛騎止之遂收隊而賊以大股乘其後我軍回兵
力擊勝之二十日偵知廣福寨下之賊移入東堰口
上之羅家山衝其地爲小池驛後畷我軍因又移進
太湖界之玉房尖天頭山甌皮尖等處逼之并派守
兵於潛山之水吼嶺天堂以重後路二十六日山外

大戰卽派貞中蕭慶衍副左胡紫雲元右沈俊德元
左劉長槐強右李續遠剛右彭炳武信左巢日昇七
營循甌皮尖而上吉右朱品文信中彭星占毅右郭
鵬程循紅長山而進金國琛同毛有銘李光燦率湘
中湘右營由廣福寨山直下余際昌丁華先及潛山
知縣葉兆蘭亦率昌禮桂及兆字等營由高橫嶺進
至銀珠塔王家牌樓等處均沿山兜擊其時山外馬
步各軍正在得手賊沿山內竄而不虞我軍又由山
內突出也奮力夾攻賊遂前後受敵奪路亂竄我軍
縱橫截擊斬擒約三千餘名是夜金國琛丁華先葉

兆蘭分率各營乘勝追剿至潛山河邊而橋已折斷
逼賊淹斃無數余際昌亦派昌營銜枚夜走追賊至
柏樹灣又分路追至野人寨擒斬均不下數百名并
生擒黃衣賊目僞指揮傅得高僞丞相葉榮發僞將
軍舒春華斬之此則潛山山內各軍會剿夾擊之情
形也太湖圍城之師均臣會國藩所部以總兵朱品
隆主事李榕統帶管理臣等加派恆左恆右曾貞幹
督左楊得武益之臣會國藩以援賊既悍且多援賊
大破則城賊自孤因撥圍師七營交朱品隆前往助
剿援賊其圍攻太湖之師則交李榕專主之正月二

十二日城賊出隊東南隅山岡約二時之久欲渡河以窺我營湘後右營出隊擊之賊遂出大股由河邊包抄而來曾貞幹派恆左恆右前往策應扼其包抄之路賊另以悍賊千餘死力抗拒曾貞幹督勇直前擊斃黃旂花旗悍賊數十名岳字營張岳齡督勇繼至李榕督西門各營併力痛勦斃其悍賊多名賊遂敗退入城自是不敢復出日盼援賊接應二十六日援賊大敗李榕知城賊膽寒預伏各營分路截勦恆左恆右曾貞幹則以一營迅繞其前一營追勦於後多隆阿亦先於桃花鋪一帶派各起馬隊并知曾各

營設伏是夜二鼓賊果宵遁伏兵四起擊之太湖縣知縣蔡鶚亦率團練截殺擒斬無算其未能逸出者尙半盡數殲之遂將太湖城池克復此二十六日城賊知援賊已敗竊路而逃馬步設伏邀截克復城池之情形也是役也逆首陳玉成勾結各路粵捻大股十數萬而來非鮑超以三千餘人獨禦前敵血戰兼旬則援應各師必有緩不濟急之勢非潛山縣知縣葉兆蘭據天堂籌兵食以導楚軍則金國琛余際昌丁華先各軍無由閒道出奇以拊其背而扼其吭非宿松各軍如朱品隆李榕等去易就難換圍太湖分

扼羅溪河助勦小池驛急則密爲補救勝則無一言
功則太湖圍師無由抽撥卽無以迎擊援賊非多隆
阿去歲先克石牌制賊要害審機審勢料賊如神其
馬隊之驍果步兵之精強苦戰彌月勤勞獨著則新
倉小池驛糧道難通必無以破援賊而全大局今幸
仰仗 天威各軍同心戮力合計各路各戰殺賊
約二萬餘踏平賊壘百十座焚燬賊棚賊館數百處
太湖城池亦卽同日克復此軍興數年以來僅見之
大戰也福州副都統多隆阿統籌大局謀勇兼優摧
堅陷陣所向披靡湖南綏靖鎮總兵鮑超勇摯堅強

力遏兇鋒惟均係二品大員臣等未敢擅擬請獎伏
候 聖裁所有戰功尤著之員吉林伯都訥鑲黃
旗佐領圖爾格齊巴圖魯金順擬請以協領儘先補
用并加副都統銜黑龍江呼蘭鑲藍旗佐領儘先卽
補協領綢一巴圖魯溫德勒克西擬請加副都統銜
總理營務候補知府邢高魁擬請免補知府遇有湖
北道員 記名簡放總理營務戶部主事閻敬銘
翰林院編修衛榮光擬請均以知府畱於湖北遇缺
補用禮部主事李榕擬請免補主事以員外郎遇缺
卽補并請 賞戴花翎 記名總兵湖北竹山

協副將朱品隆擬請交部從優議敘總兵銜湖南乾
州協副將成大吉請以總兵 記名簡放副將銜

儘先參將四川梁萬營都司直勇巴圖魯雷正綰擬
請以副將儘先補用并加總兵銜副將銜儘先參將
四川重慶鎮中軍游擊穆正春候補副將王載駟擬
均請 賞給勇號副將銜儘先參將壯勇巴圖魯

楊朝林擬請以副將儘先推補儘先都司奈福象擬
請以游擊儘先推補并請 賞給勇號花翎儘先

都司唐啟虞李德彥擬均請免補都司以游擊儘先
補用并加參將銜儘先副將宋國永擬請 記名

以總兵簡放副將銜儘先參將蘇文彪擬請以副將儘先補用并請

賞給勇號儘先副將唐義訓請

賞給勇號副將銜儘先參將鄭陽和擬請以副將儘先補用并請加總兵銜儘先參將段福擬請以副將儘先補用并請

賞給勇號道銜候選知府

金國琛請免選知府以道員用副將銜參將余際昌請免補參將以副將儘先推補湖南候選訓導丁華先請免選訓導以知縣不論雙單月儘先選用并加同知銜革職畱任太湖縣知縣蔡鐸請開復原官免繳捐復銀兩至此外出力文武員弁兵勇擬請擇尤

保奏出自

天恩又員弁兵勇血戰捐軀均堪憫

惻除另行查明

奏咨請卹外所有陣亡之游擊徐

勝祿游擊銜都司陳士富易長春均請照參將例議
卹守備朱榮發李年治阮鎮定守備銜千總王發貴
均請照都司例議卹文童曾益明蔣益彰均請照從
九例議卹守備銜千總鄒國勝千總丁光玉周得祥
張建功彭美材江庭梧劉明日五品藍翎千總李鳳
林均請照守備例議卹五品藍翎把總張倫震藍翎
把總張得勝把總楊名倫均請照千總例議卹外委
楊得信李洪興陳東六姜益勝曾志祥均請照把總

例議卹又把總朱年升吳雙貴均請照千總例議卹
擬保把總劉上元蔡立階均請照把總例議卹外委
黃海清黃光亨鄒宇鴻張殿甲王叶夢馬得勝胡得
勝吳永清何長有均請照把總例議卹文童譚魁廷
柏玉成均請照從九例議卹藍翎千總成宇周請照
守備例議卹藍翎把總胡光祥請照千總例議卹又
霆營守備銜藍翎千總劉鑑秋請照都司例議卹藍
翎把總徐玉麟請照千總例議卹藍翎外委趙長福
外委孫益和均請照把總例議卹一併仰乞 恩
施格外以慰忠魂謹將大破援賊克復太湖城池各

緣由合詞恭摺馳奏

上諭官文胡林翼曾國藩奏官軍大破援賊克復太湖城
池一摺 官文胡林翼曾國藩督師進剿調度有方均
著先行交部從優議敘副都統多隆阿著賞戴頭品頂
戴總兵鮑超著賞加提督銜吉林鑲黃旗佐領金順著
以協領儘先補用并賞加副都統銜黑龍江廂藍旗佐
領卽補協領溫德勒克西著賞加副都統銜候補知府
邢高魁著免補知府記名遇有湖北道員缺出請旨簡
放戶部主事閻敬銘著以本部員外郎卽補翰林院編
修衛榮光著賞加五品銜遇有侍講缺出開列請簡禮

部主事李榕著免補主事以員外郎遇缺卽補並賞戴
花翎記名總兵竹山協副將朱品隆著交部從優議敘
乾州協副將成大吉著以總兵記名簡放儘先參將梁
萬營都司雷正綰著以副將儘先補用并賞加總兵銜
游擊穆正春著賞給勤勇巴圖魯名號候補副將王載
駟著賞給揚勇巴圖魯名號儘先參將楊朝林著以副
將儘先推補儘先都司余福象著以游擊儘先推補並
賞給績勇巴圖魯名號花翎儘先都司唐啟虞李德彥
均著免補都司以游擊儘先補用並賞加參將銜儘先
副將宋國永著俟補副將後記名以總兵簡用儘先參

將蘇文彪著以副將儘先補用并賞給確勇巴圖魯名
號儘先副將唐義訓著賞給堅勇巴圖魯名號儘先參
將鄭陽和著以副將儘先補用并賞加總兵銜段福著
以副將儘先補用并賞給勛勇巴圖魯名號候選知府
金國琛著免選知府以道員用參將余際昌著免補參
將以副將儘先推補候選訓導丁華先著免選訓導以
知縣不論雙單月儘先選用并賞加同知銜革職畱任
太湖縣知縣蔡鏐著開復原官免繳捐復銀兩此外出
力員弁兵勇著準其擇尤保奏候朕施恩其力戰陣亡
之游擊徐勝祿都司陳士富易長春均著照參將例議

卹守備朱榮發李年治阮鎮定千總王發貴均著照都
司例議卹文童曾益明蔣益彰均著照從九品例議卹
千總鄒國勝丁光玉周得祥張建功彭美材江庭梧劉
明日李鳳林均著照守備例議卹把總張倫震張得勝
楊名倫均著照千總例議卹外委楊得信李洪興陳東
六姜益勝曾志祥均著照把總例議卹把總朱年升吳
雙貴均著照千總例議卹擬保把總劉上元蔡立階均
著照把總例議卹外委黃海清黃光亨鄒宇鴻張殿甲
王叶夢馬得勝胡得勝吳永清何長有均著照把總例
議卹文童譚魁廷柏玉成均著照從九品例議卹千總

成宇周著照守備例議卹把總胡光祥著照千總例議
卹千總劉鑑秋著照都司例議卹把總徐玉麟著照千
總例議卹外委趙長福孫益和均著照把總例議卹以
慰忠魂該部知道欽此

克復潛山縣城疏 二月初十日督發

竊征皖之兵於正月二十五二十六等日大破援賊
立克太湖縣城業經 奏報在案查接壤太湖之潛
山四面環河阻水該逆自八年冬復踞以來修城濬
濠旁出四擾賴潛山縣知縣葉兆蘭於去年率其團
眾奪獲天堂要隘始不得逞本月二十六日我兵大

捷之後小池太湖餘賊竄入潛城者萬數千人與城賊合力抗拒多隆阿會商諸軍以鮑超唐訓方等營搜剿各山匿賊而自率馬步同蔣凝學八營趙克彰朱希廣李雲麟三營并約會葉兆蘭督率練勇乘賊大創驚魂未定輕騎裹糧逼城而壘以六成隊整旅前行以四成隊押運鍋帳已刻抵潛山距城約數里立營乃該逆收合餘燼乘我修壘未成悉眾直前衝突我軍排隊迎擊多隆阿以所部步隊各營并建威營攻其左蔣凝學以湘軍八營及新前新後兩營攻其右多隆阿親帶馬隊直擊其前馬步並進奮力衝

殺斃賊甚多該逆拚死抗拒轉戰數時我軍屢勝之
兵勇氣百倍賊勢不支葉兆蘭督練襲擊其尾賊遂
大潰多隆阿先以馬隊截其歸路該逆不敢入城巢
穴旣失賊愈狂奔馬隊追殺至桐城縣屬之青草壩
沿途殺賊不計其數各營步隊搜殺餘匪卽於正月
二十八日克復潛山城池奪獲鎗礮刀矛萬餘件米
糧萬餘石此次大破援賊連復堅城仰賴 皇上
天威將弁齊心士卒用命其戰功尤著之副將銜候
補參將楊富有周忠容可否均請以副將儘先補用
儘先參將王可升可否請加副將銜以上三員可否

均請

賞給勇號儘先游擊毅勇巴圖魯趙既發

可否請以參將儘先補用并加副將銜其餘在事出力員弁兵勇可否擇尤保奏出自

天恩其首先

衝陣力戰陣亡之都司王定和都司銜守備蔣貴祿均請從優照游擊例議卹把總曹自文王澄清均請從優照千總例議卹儘先外委樊祿斌藍良貴周義和彭行吉劉光英李桂元均請從優照把總例議卹其餘傷亡弁勇容再查明分別請卹以昭激勸而慰忠魂謹合詞恭摺馳

奏

再革職畱任潛山縣知縣葉兆蘭廉明勇敢深得民

心前歲三河變後到任未十日在鄉練團客兵既潰
潛城旋陷被議革職畱任以觀後效時太霍桐舒四
圍皆賊葉兆蘭能於萬難措手之中約集團練紳民
倡舉義旗立爲兆字五營奪還天堂要地廓清潛境
三百餘里分防力守以扼焚賊嗣因官軍入皖復能
確探賊情圖呈地勢其成由內山外夾擊之策爲官
軍嚮導預備米糧夫役運濟無誤雖經賊匪迭爭此
險卒能屹立不移并以兆字五營助防助勦力挫賊
鋒旋卽大破援賊越境收復太湖城池未及三日又
克復潛山縣城實屬良吏良

將爲軍務地方不可多

得之才此次勞績尤著不僅功過相抵合無仰懇

天恩俯準將革職畱任潛山縣知縣葉兆蘭開復原官免繳捐復銀兩并請開缺以同知直隸州仍畱安徽遇缺卽補伏候 聖裁再該員於九年冬報

丁母憂時值援賊上犯潛山地方尤爲喫緊士民遮

道攀畱情詞迫切經 臣等批飭暫畱五月咨會皖撫

臣翁同書核奏在案刻下潛山克復該員葉兆蘭稟

請歸葬守制自應俯如所請遂其孝思惟潛山員缺

緊要餉道所關應由皖撫 臣遴委明幹賢員趕緊接

替除分別咨行外謹合詞附片具 奏

上諭官文胡林翼會國藩奏官軍克復潛山縣城請將出力及陣亡將士分別獎卹并請將已革知縣開復原官獎勵等語安徽潛山縣城自被陷後逆匪修城濬壕爲久踞計知縣葉兆蘭於上年奪獲天堂要隘賊勢始蹙正月二十六日官軍攻克太湖後餘匪竄入潛山併力抗拒副都統多隆阿等督兵前進距城數里賊眾悉行出撲兵勇奮力追擊賊遂大潰并因馬隊截其歸路不敢入城狂奔至青草壩地方被殲無數潛山縣城卽於二十八日克復所有在事尤爲出力之副將銜候補參將楊富有著以副將儘先補用并賞給冠勇巴圖魯名

號周忠容著以副將儘先補用并賞給勤勇巴圖魯名
號儘先參將王可升著賞加副將銜并賞給奮勇巴圖
魯名號儘先游擊趙旣發著以參將儘先補用並賞加
副將銜陣亡都司王定和都司銜守備蔣貴祿均著從
優照游擊例議卹把總曹自文王澄清均著從優照千
總例議卹儘先外委樊祿斌藍良貴周義和彭行吉劉
光英李桂元均著從優照把總例議卹其餘出力員弁
兵勇及陣亡將士著官文等查明奏請分別獎卹潛山
縣知縣葉兆蘭前因城池失陷革職畱任其時該員到
任未經十日隨糾集團練爲官軍嚮導遂能奪獲天堂

要地并確探賊情圖呈地勢俾太湖潛山兩城得以先
後克復洵屬著有勞績葉兆蘭著開復原官免繳捐復
銀兩并準其開缺以同知直隸州知州畱於安徽遇缺
卽補該員丁母憂復經官文等奏請暫畱本任現值縣
城克復卽著準其回籍守制該部知道欽此 二月二十

四日奉

奏陳統兵道員現已到營各軍分路進規疏 三

月初五日

查布政使銜荆宜施道李續宜前因母病乞假嗣聞
下游警報雖母病未痊已於正月啟程二月杪到營

臣所部各營現均分撥多隆阿李續宜管帶其才力
膽識均可各當一路皖地二月以來連旬陰雨俟天
氣晴明即可向懷桐進取惟總兵鮑超因傷病請假
三月離營養息以副將宋國永代領其軍暫資後路
防守皖疆現已肅清三百餘里楚疆門戶自更穩固
臣因病仍回居楚界暫資調養謹恭摺具奏

硃批知道了欽此

三月十九日奉

再臣前在黔省於道光三十年卽帶領兵勇駐紮帳
房十年以來積受潮熱兩頤頭頂赤癬數處痛癢難
堪近年夜不能寐左手足酸痛異常正月以後風溼

鬱積倍形委頓據醫云肝脾溼熱日深心氣大虧若
不及早醫調恐成急症合無仰懇 天恩賞假一

月俾 臣 離營調養前敵將領現均有人 臣 所管帶各

營均分隸多隆阿李續宜管帶兵事儘可得力謹附
片具 奏

上諭胡林翼奏因病懇請賞假等語胡林翼著賞假一箇
月調理欽此 三月十九日內閣奉

恭謝 恩加議敘疏 三月二十七日

本年二月十四日奉 上諭官文胡林翼曾國藩
奏官軍大破援賊克復太湖城池一摺官文胡林翼

會國藩督師進剿調度有方均著先行交部從優議敘欽此竊臣前歲冬月負罪出山墨經從戎黃州整旅祇以援湘之故暫緩東征繼畱入蜀之師尙煩西顧幸堅城之克復凜經歲之稽遲迺荷天語遙

頒

寵加優敘捫心增惕矢志彌殷

臣

惟有宣布

恩威撫綏將士同殷敵愾力埽狂氛以期仰副

鴻慈高厚於萬一所有

微臣

感激下懷恭摺具

奏

請免革員發遣畱營效力片

閏三月十一日

再已革總兵李續燾趙克彰已革副將謝永祐已革

游擊李運絡前因三河桐城債事經臣等審明定擬從重發往新疆充當苦差並因行閒需人暫緩起解畱於前敵責令立功自贖欽奉諭旨著照所請

等因欽此欽遵飭派該革員等管帶勇丁馳赴湖南寶慶獲勝解圍調回湖北復派往前敵隨各路剿辦年餘以來深知愧奮甚屬出力此次助剿皖氛大破援賊踏燬賊壘賊館數百餘處克復太湖潛山兩城該革員等連日血戰迭獲奇勝均各身先士卒奮勉立功現值東征喫緊該革員等爲軍中得力之員可否仰懇天恩俯準將李續燾趙克彭謝永祜李

運絡免其發遣仍畱軍營效力以資征剿之處出自
逾格隆施謹合詞附片具 奏

上諭官文等奏革員奮勉立功請免罪畱營等語著照所
請均準免其發遣新疆仍畱該大臣等軍營效力以資
得力欽此 三月二十一日內閣奉

請獎防剿舒城克復建德各員片 閏三月二十
八日

再援賊上犯時臣等以新仁營吳廷華茂字營陶茂
林義中營梁洪勝英字營胡世英入駐霍山之樂兒
嶺以防舒城之賊乘虛竄援正月二十一二十二等

日山內山外各軍夾擊援賊得勢探知三河桐城諸賊均集舒城約之併力援竄臣等因飛飭霍山一軍同時進擊舒城使賊不敢上援太潛二十四日各營裹糧前進誘賊出戰伏兵齊發分路包抄殺賊不計其數梁洪勝轟斃黃衣賊目僞丞相張天福一名我軍遂乘勝踏破賊壘五座賊卡七處斬擒又約六七百人餘賊敗退入城不敢再出是太潛之克復亦賴有此捷絕其賊援也除各營陣亡受傷弁勇另行分別養卹外所有湖北候補府經歷縣丞吳廷華擬請免補府經歷縣丞以通判儘先補用并加同知銜參

將銜候選游擊陶茂林擬請免補游擊以參將儘先
補用游擊銜儘先都司梁洪勝擬請免補都司以游
擊儘先補用把總胡世英擬請以千總拔補縣丞銜
沈定垣擬請以縣丞不論雙單月儘先選用又查湘
新後營周萬倬以一營六百餘人駐紮皖南東流縣
城以重南岸邊防保護水師餉道兩載有餘戰守得
力正月內同復建德城池該營於敗賊出城復追奔
截殺擒斬極多其尤爲出力弁勇謹擬附清單請獎
儘先游擊周萬倬擬請以參將儘先補用謹合詞附

片陳奏

請獎潛山縣團練出力士民疏 閏三月二十八

臣等查皖省各郡縣自咸豐三年以來淪陷賊中難於振拔究之民風因士習爲向背而士習因吏治爲轉移潛山縣天堂地方爲太潛桐城英霍各路樞紐咸豐八年十月三河失利之後客兵旣潰潛城亦陷知縣葉兆蘭在鄉練團蒞任未十日起而倡之士民感激奮興以團眾數百人拒賊於柳家畝九年正月火攻長嶺崗奪還湖鄉二月三月擊賊於水吼嶺天堂生擒僞檢點張逆正法遂奪還天堂并大破雷家嶺賊柵扼而守之斷賊接濟五月破賊於菖蒲潭六

月編立兆字五營紮五壘於白雲山營制一如楚軍
又別遣練目分守各卡其餘團眾則士農工商均編
入伍聞警畢集十月賊謀襲太湖官軍之後兆字營
扼水吼嶺而分出逆水槎水擊之兩戰皆捷追賊至
龍井關及楚軍入天堂兆營實爲嚮導同破賊於黃
婆埭又破舒城援賊於槎水十二月援賊麤聚潛西
臣等調派大隊復由天堂山內開道以拊賊背團勇
分守各隘遏賊內竄并協助官軍擊破援賊十年正
月連捷於高橫嶺松樹壇王家塆白水灣一帶二十
六日越境剿太湖之銀硃塔東堰口旋同下太湖城

古蹟通集卷三
二十七日追賊至潛西河橋二十八日遂隨官軍合
擊潛城克之此潛山士民自八年十月至十年正月
先後奪還險隘剿賊獲勝隨同官軍連復二城之實
在情形也天堂爲賊所必爭之地該處士民扼守險
要以待楚師歷一年三月之久戰守均爲出力所有
軍裝軍餉以及傷亡養卹又皆民捐民辦不取公家
一文亦不經吏胥之手在潛山士民各攄忠憤本屬
義分之當爲惟念偏隅小邑被賊擾害尙能倡率義
旅同仇敵愾自應據實訪舉以副 聖朝教忠旌
善之至意除屢次力戰陣亡勇丁另行造冊咨部外

其殺賊立功力竭捐軀之州同銜徐貴馨擬請追贈
知州照知州例議卹文生汪春濤儲者才聶世芬汪
炳南儲士硯五名均擬請追贈訓導照訓導例議卹
監生儲萬理儲篤因二名均擬請追贈從九照從九
例議卹六品軍功武生宋如虎儲列二名均擬請追
贈千總照千總例議卹六品軍功童生王三畏張金
元王心維葉含英崔守信葉蘭芬張文俊儲超遠汪
同德黃時昭儲爲美陳芳元王含章陳玉泉黃家麒
儲三魁金魁元十七名均擬請追贈把總照把總例
議卹并乞
恩旨準飭潛山士民自行捐建昭忠

祠俾陣亡紳勇一體入祠以慰忠魂而彰節義其管帶各營及首倡義舉督隊帶隊殺賊立功之尤爲出力士紳謹繕單請獎可否均邀 恩施格外以昭激勸之處伏候 聖裁臣等爲振作士習民風起

見謹合詞會同安徽撫臣翁同書恭摺具 奏

請獎黃廣宿太英五縣團練出力士民疏

閏三

月二十八日

查楚皖交界之黃梅廣濟宿松太湖英山五縣疆域犬牙相錯屢逼寇氛辦理團防勢同唇齒前歲三河失利安慶圍軍回援楚境皆自賊中衝突而出路徑

生疏軍糧匱乏甚賴五邑集團相助全軍固圉得力
已多今正連克太潛亦資團防協助之力當羣醜蜂
屯蟻聚之時逆醜方張五邑自顧不暇而猶忠義奮
發戮力同心士氣民風實爲難得黃梅廣濟黃州下
游邊邑也地濱大江又居江皖衝要軍興以來無歲
不用兵於此自覃瀚元令黃梅方大湜令廣濟以來
辦理團防兩邑官紳一氣無戰不從無役不至不特
攻小池攻九江攻湖口賴其協助卽今安慶桐城未
復水陸助防飛輓無已辛勤數載未獲息肩宿松則
知縣黃開元於八年冬接任視事勸諭鄉團謀濟軍

食義旂一舉保守城池助官軍敗賊於城邊又敗賊
於畫蘭亭嚴恭山等處旋越境助戰護送前敵軍糧
屢有擒斬太湖英山則知縣蔡鏐知縣何家驄齊集
團練分派董紳防守白洋保南陽河沙場保柿樹鋪
羅溪河馬齒嶺柳林河石頭嘴等處扼盡太湖潛山
西北要隘以濟官軍之所不及正月二十六二十八
等日官軍克復太湖潛山其竄逸西北之賊爲五縣
團勇截殺極多雖該士民義憤所激原無妄生希冀
之心而臣等訪察旣真未敢沒其微勞致負 聖
朝勸善旌忠之至意除屢次殺賊團丁由臣等酌給

功牌彙案咨部外謹擇黃梅廣濟宿松太湖英山五
縣尤爲出力紳士繕單請獎仰候 恩施以昭激

勸謹合詞會同安徽撫 臣 翁同書恭摺具 奏

揀員升補繁缺知州疏

閏三月二十九日

竊查沔陽州知州蕭蔭恩前經 臣 等奏請開缺畱省
察看於咸豐九年三月十六日奉到 硃批著照

所請行欽此隨經 臣 等 奏請以候補知州周開錫

補授接準部覆以該員尙未引 見議駁查例載

州縣應調缺出俱令於現任人員中揀選調補無合
例堪調之人準以候補人員題補如候補無人亦準

於應升人員內揀選題升又府屬知州知縣俱酌定
久任亦必於本任內歷俸三年以上方準揀選題升
如初任選補之員俱以到任之日起由現任人員調
任者準其將從前本身所歷本職之俸前後接算各
等語該州爲繁疲難兼三要缺地廣賦繁兵燹之後
催科撫字非精明練達之員難資治理臣等前因通
省實缺知州中均歷俸未滿人地未宜以候補知州
周開錫請補茲經部駁自應另行揀補惟實缺旣無
合例可調之員而候補班中亦更無足勝任者應於
應升人員內揀選請升查有天門縣知縣梁照現年

四十四歲廣西舉人寄籍河南由候選知縣選授湖北宜城縣知縣六年三月初九日到任八年 奏調天門縣繁缺接準部覆前後繁簡接算知縣之俸已滿三年且知州係知縣應升之階該員樸誠幹練才守兼優以之升補沔陽州繁缺洵堪勝任惟調缺請升與例稍有未符但人地實在相需應照例聲明具奏據藩司莊受祺臬司嚴樹森會詳前來合無仰懇天恩俯準將沔陽州一缺以天門縣知縣梁照升補該員任內並無私罪暨因公降畱處分所有罰俸案件飭令照例完繳如蒙 俞允俟接準部覆

後照例給咨赴部引 見所遺天門縣係衝繁難
要缺容另遴員請補合併陳明所有揀員升補府屬
知州緣由謹合詞恭摺具 奏

硃批吏部議奏欽此

胡文忠公遺集卷三十六終